

長樂縣志卷二十六

列傳六 忠義 節概 孝弟 義行 隱逸 流寓

忠孝者天地之正氣古來忠臣孝子史冊所以特書也推之孤臣志士悌弟仁人天性暨已無虧卽姓名亦堪不朽至隱逸流寓諸君子或以邱壑爲懷或令山川生色其清標高躅雖曠代猶時深仰止之思焉傳忠義節概孝友義行隱逸流寓

忠義

宋

陳文龍字君賁號德雲原籍莆田幼隨父遷邑之后山家焉咸淳四年廷對第一由鎮東節度判官歷監察御史先是臺中有建白皆

長樂縣志

卷二十六 列傳六

一

忠義

呈稿賈似道文龍獨否似道不悅出知臨安府襄陽圍急似道陽請督師無行意襄陽遂陷文龍疏論其罪又言范文虎當罰而賞趙潛乳臭子黃萬石怠荒皆不勝任似道怒黜罷之未幾元兵東下文虎首迎降似道兵潰魯港潛最先遁度宗始悔不用文龍言起爲左司諫遷侍御史時邊事急王爚與陳宜中不相能文龍疏曰書稱三后協心同底於道北兵今日取某城明日築某堡而我以文相遜以迹相疑譬猶拯溺救焚而徐行安步也請召大臣同心圖治無騰虛說累遷參知政事而元兵已至杭北關外衆議降文龍乃上章乞歸養既復求還不報德祐丙子益王卽位福州復以文龍參知政事元兵至福州益王趨廣文龍以前官充閩廣宣

撫大使殫家財募兵萬人卽興化軍開闔已而元兵入廣建寧泉福皆降知福州王剛中遣使徇興化文龍斬之元人來攻不克使其姻戚持書招諭文龍焚書斬使遣將林華偵伺境上華亦降元導兵至城下通判曹澄孫開門降執文龍與其家人至文炳軍中不屈左右凌挫之文龍指其腹曰此皆節義文章也可相逼耶引而就館元帥唆都往來諭意且以母老子幼感動之文龍曰我家世受國恩萬無降理母老且死先皇三子歧分南北我子何足關念情詞慷慨唆都愀然改容械送杭州不食死其母病繫福州尼寺中左右視之泣下母曰吾與吾兒同死又何恨哉亦死訃聞詔諡忠肅賜廟號昭忠元至正間遣使李文虎至郡訪求陳文龍子

孫將錄用無一應者

乾隆賀志

陳瓚字瑟玉文龍從子也少有大節知天下必亂無意仕進散粟出帛以濟饑寒曰吾世受國恩當爲國收人心耳文龍起參知政事瓚獻策曰今天下已危莫若勸上悉召四方兵分屯沿江要害敵來併力以戰猶可爲也文龍愀然曰策甚善柄國非人恐不能用是行也吾必死之德祐丙子端宗趨廣瓚出家財三百萬緡航海助餉張世傑欲授以官瓚曰某激忠義而來豈買爵耶辭歸十二月叛將林華陳淵與通判曹澄孫以城降元文龍被執北去瓚陰部署賓客丁壯攻林華等誅之復興化軍端宗嘉其忠義命以通判權守興化元帥唆都來攻瓚號令嚴整每巡城必南面號慟士

皆感奮逾月力不支被執峻都欲降之大罵不屈峻都怒車裂以
殉事聞贈兵部侍郎諡忠武子若水世傑辟爲督府架閣夏允彝論云陳
德雲以廷元死忠節其不負科名何愧文信國且從子瓚能繼其
志亦以忠死爭光日月矣舊志乃佚不載然則忠臣烈士湮沒簡
編之外者何可勝數哉
並祀忠義祠乾隆賀志

楊夢斗字子仰號山甫東渡人以文章起家寶祐四年同兄琦弟叔
濟姪次鄭登文信國榜進士官揚州都統使鎮服夷酋與琦叔濟
次鄭分守要害景炎末宋室播遷夢斗與文信國力抗元師兵敗

赴揚子江死里人立祠祀之扁其額曰文章節義邑祀忠義祠夏允彝論云楊公死難事甚烈傳夢於故里父老衆共祀之特爲建祠以承祀公斯固異矣余志已告成諸生林日儁高熹任屢夢公促余志其忠烈事且云大戰難守大敗不辱又云忠肝烈膽南州得失詎不關心蓋余傳公於神祠而未傳公於忠烈誠爲失之兩生

長樂縣志

卷二十六

列傳六

三

忠義

大雅士非誕言者公之大節固當與文信國並衡而三以夢著忠魂未散日月爲光尤異也哉余旣爲傳復系以詩詩載藝文志乾隆賀志

陳公榮字子華十九都人龜圖十三世孫

按龜圖字謀孫端拱元年進士國子監丞知信州進

朝散大夫初游太學景炎元年元兵入寇徵兵勤王無有應者榮破產

募兵謁文丞相共圖興復丞相喜薦授福清知縣時蒲壽庚以城降元榮同子宗傳姪老成會張世傑討之宗傳老成戰死偕死者百七十人事聞贈宗傳提刑簡法老成御史臺簡法一切祭葬各有差榮臨終戒族人無事二姓故終元之世無一人附宦籍者明興科第蟬聯遂爲吳航甲族祀本里三忠祠榮有挽從子老成詩及宗傳從軍行並載

藝文志乾隆賀志

高應松字箕畝嶼頭人開慶元年進士由衡州教授通判廣德軍召爲國子監丞擢禮部員外郎翰林院權直元兵陷臨安自湧金門入舉朝奔竄從官存者九人應松其一也同留者正言陳春伯侍郎翁仲德大理寺卿郭珙皆福州人是日除應松中書舍人直學士院令草降表應松泣辭改權工部侍郎進端明殿學士簽書樞密院事時國事已去擁虛名而已恭帝及太后北行應松扈從至燕絕粒不語越七日而卒著有箕畝策集郡邑並祀

乾隆賀志參道光通志

陳覺伯字宗尹父如晦傳見儒林覺伯咸淳七年進士夙承庭訓與高應松友善教授泉州以古道迪士景炎初幼主航海舟次泉州港覺伯率同列表問起居命攝州倅扈從入廣拜福建提刑數月

長樂縣志

卷二十六

列傳六

四

忠義

罷歸聞崖山師潰憤惋不食卒遺命其子曰吾宋臣也題墓當係吾於宋應松弟旂爲撰墓銘

乾隆賀志

明

黃銅字孔鑄青山下人英勇明決里有福安寺僧恃富囂訟爲虐於鄉銅年十三能以計除之中洪武庚午舉人選廣西僉司升光州守會靖難師起密詔戒諸將毋殺皇叔父銅憤且泣曰惡有不殺而可以禁攻寢兵者乎吾當奮死爲之違旨滅族非所計也及舟戰親持矛入燕王舟不中而蹶復陸戰以不善馬被獲長笑而死

夏允彝論云銅事甚烈前志以事類斬祛置不錄然成祖有言練子甯若在固當用之何得諱銅事不傳哉乾隆賀志

王恩及字戴君號澹侯羅仙人少端莊不屑與羣兒伍從師肄業山

庄階前忽出竹筭一晝夜光齊几上恩及顧笑曰大丈夫氣節勁直不回不當若是耶平日閱忠臣孝子義夫節婦傳輒流連向往之天啓辛酉嘉興譚學使拔取第一領是秋鄉薦崇禎癸未謁選令廣東信宜縣地界兩粵萬山中夷獠雜處勉力撫綏恩威互用不期月風俗頓更甲申後四郊多寇恩及集壯丁捍禦間或勦賊躬冒矢石縣賴以完當事才之隆武乙酉召赴行在欲破格擢用唐王旋出駐延建恩及從閒道歸養老母身負坏土經營先墳中林得毒草藏以備用丁亥秋魯王監國召爲監察御史猶正色立朝時事棘且殆毫無忿鬱不平之氣戊子夏五與妻李氏同仰藥死清乾隆四十一年予諡節愍

乾隆賀志

高飛聲字克正十九都流水人好學性嚴毅崇禎癸酉舉人知江西

玉山縣有巨寇據險久莫能制飛聲躬搗其巢平之尋擢撫州同

知以母老乞歸後因明亡死之清乾隆四十一年予諡節愍

乾隆賀志

陳翔字克理長祚孫

長祚見名臣傳

崇禎癸未進士授中書舍人時國家多

難大學士黃景昉假歸翔奉命催起景昉堅不赴召得旨以陳翔

奉差不力該部嚴處旋闖賊陷京都翔抗節不屈備受夾拷後慟

哭南旋負重傷卒識者謂其死於忠也弟審字克乙兆熙字克時

兆鼎字克重隱居不仕均以節終子殿邦順治甲午舉人逆耿迫

召避地福清後官陝西延安府同知

同治彭志

陳家麟字恭夫邑諸生恂恂儒素言行謹恪族中科甲三百年來盛

冠一郡甲申後痛國運淪喪常鬱鬱不自得丁亥間沿海義兵遍起家麟喜曰此吾致命日也大事濟否固知有天安能效兒女子逡巡不出貽終天恨哉結義勇百餘鼓行而進家業不踰中產罄所有以佐軍無援死之

同治彭志

林逢經字守一號鐵崖祖世章父裕陽均見名臣傳逢經幼聰穎博洽多才年十四補諸生尋食廩餼松江夏允彝知縣事與結文字契福州改元三事交薦授誥勅撰文中書舍人旋兼司經局正字翰林院五經博士轉兵部武選司主事改翰林院簡討預脩毅廟實錄時勳鎮跋扈官方無序逢經封章屢上或勸其職非諫員何必曉曉賈禍經曰傳云孔父正色而立於朝則人莫敢過而致難

於君者吾海濱男子累世承恩無可報稱目此狗鼠輩弁髦至尊豈忍箝口不言甘同寒蟬乎聞者心折丙戌秋披緇入山廬於臨安君墓下除夕賦詩一字一淚丁亥起原官兼監察御史朝夕兢兢忠勇奮發戊子夏大衆奔竄逢經曰吾天朝近臣不敢草草昇籃輿抵松下赴海死宗子曰昂撈尸未獲夜夢逢經含笑語曰吾已歸澳中矣及旦覓水濱得之面如生逢經出黃石齋門與曾弗人李元仲友善早歲便有天下己任志當啓禎聞見任用非人輒爲咨嗟太息或聞正人死疆場殉王事則悲憤交集世之論者僅目經爲淹博宏才孰知其一腔熱血迥出類萃惜未展施行遂所志著有苦竹吟諸集清乾隆四十一年予諡節愍子謙光傳見循

績同治彭志

李上林字大材號覺早十七都仙山人明亡死之乾隆賀志

陳颺言字孝嘉周山人國學生明亡殉難乾隆賀志

陳韜字貞盤一字湯銘邑廩生少恢宏有大志常以氣節自勵明社
屋韜涕泣終日慨然謀恢復卒以一旅無援不得遂其志全家沈
舟於海土人撈其尸神色不變立祠祀之輒著靈顯至今尙廟貌

翼然採陳氏家譜

陳翀字克號雲生古縣人以祖長祚蔭官前府都事歷工部員外
郎中轉尙寶司少卿太僕寺少卿順治七年大兵下廣東入桂林
永明王由肇慶奔梧州轉南寧翀終始隨奔走鋒鏑中疊受刀刃

長樂縣志

卷二十六 列傳六

七

忠義

負傷至潯卒友人劉伯玟轉徙七載負遺骨歸著有海霞詩集子

億正志友梓行於世同治彭志

清

柯應鳳字伯羽諸生順治二年巨寇鄭某集衆海島逼爲嚮導官應

鳳數其罪賊怒割其舌不屈死妻鄭氏觸石而斃子廩生元標元

標子順耳順耳傳見義行道光通志

邱能成坑田人遷居省城由行伍出身任臺灣鎮右營游擊乾隆五

十一年征勦逆匪林爽文打仗陣亡詔賜卹如例祀昭忠祠同治彭志

邱安國坑田人遷居省城由行伍出身任福寧鎮標中營千總乾隆

五十二年土寇林爽文肆擾臺灣國奉召赴臺進勦與賊接仗陣

亡詔賜卹如例祀忠義祠

同治彭志

池劍波字大鯨別字秋如舊池人家會城籍閩縣尚節概能文章癸卯省元乙巳進士權江西貴溪縣丙午鄉試分校得士最盛自以才力不及改就教職補興化府教授調臺灣任滿內渡宦橐蕭然同治三年補漳州府教授到署甫五日而粵匪突至士民驚散官軍亦潰城陷罵賊不絕口賊以繩繫其項劍波厲聲曰頭可斷項不可繫遂被戕後六日賊退家人檢積尸中負遺骸歸詔賜卹如例祀省昭忠祠

同治彭志

黃榮庚原名良彩字子章一字星舫明光州太守銅十六世孫也幼有至性覽其先世忠烈傳輒涕零道光癸卯舉於鄉留京師者七

年刻意勵行以文章節義自期鄉先達王文勤曰爲遠到之器中庚戌二甲進士卽用江西壬子分校鄉闈所拔多宿學士歷署豐城定南地遭兵燹戶多流亡榮庚勞來安集平獄訟靖萑苻士民德之以定南守城出力加同知銜賞戴藍翎旋授龍南令調署大庾縣事時粵匪正熾榮庚請守隘以遏賊氛太守不從請兵又不從喟然嘆曰吾固與城爲存亡耳其如生靈何已而賊匪麇至內無重兵外無援卒祇恃忠義所積激勵人心卽婦女亦知登陴禦賊效死勿去固守十晝夜卒爲地雷所轟城陷帥衆巷戰身受重傷帶創歸署囑兄兆庚速去曰歸事老母母以我爲念吾將從先銅公於地下矣遂與其妾馮氏俱仰藥恐不死復偕縊時咸豐八

年十一月三十日也榮庚平日恂恂若無異人及義所當爲則毅然不可奪古所謂殺身成仁者殆庶幾焉著有考訂孔孟年表儀禮精華詔以知府卹贈賜祭葬祀忠義祠世襲雲騎尉子以荃邑

諸生

同治
彭志

楊鵬南字翼季集星橋人居會城由行伍補軍標把總咸豐癸丑三月順昌土寇四出劫掠監司胡應泰請兵捕勦巡撫王懿德檄參將李煌督兵赴延鵬南與焉比至卽聞賊首黃有使陷永安尋又陷沙縣副將李壽春令鵬南同千總宋世超外委陳文亨爲藩駐三門鵬南謂世超曰三門三面受敵且兵少不可守不如扼西芹西芹庄大糧足萬一失利退守七星橋尙可阻險作郡城障奈何

長樂縣志

卷二十六

列傳六

九

忠義

以西芹之糧棄以飽賊也世超怵於軍令不聽四月二十八日賊入西芹是時三門兵不滿百又分三隊以文亨守溪岸爲藩守后山鵬南世超守中路賊不得進南平隸卒盧超導賊破后山爲藩奪小舟而走守中路者不知也忽所部兵大呼賊至鵬南持鎗向後擊之斃數賊鎗忽墜復奪雙手帶衝圍出賊從密箐中施矛刺之遂與世超文亨同時被難鵬南仲兄春蕃邵武教諭聞耗請假赴延平收其尸歸事聞贈卹如例祀省昭忠祠吁鵬南壯歲負勇畧方出其力爲國家用何竟以一戰畢乃生也悲夫

同治
彭志

王三韜字尙鑑一字旬臣旒峰白眉村人由武舉補督標千總咸豐三年龍巖土寇黃有使作亂三韜守延平以功遷中營守備六年

紅巾賊麤聚順昌十三鄉四出擄掠總督王懿德檄三韜募長樂勇三百進勦戰功偉著賊勢窮蹙郡守金萬清倚之時督糧道王訓統兵駐邵武聞光澤警調三韜守鐵牛關未幾紅巾復猖獗秋七月三韜赴大幹敗賊於東鄉一日賊乘夜驟攻三韜兵乏知勢不能敵且天色迷濛不辨南北欲突圍出鄉民蟻附攀轅哭聲動地勉力拒守賊破柵入兵勇潰散過半退至吳家祠賊圍之三韜謂兵勇曰爾輩儻去定遭賊手辱矣傾礮於地引火燃之烈燄障天皆灰燼踰垣出者僅三人越日萬清聞耗仰天號曰天絕我矣事將不可爲亟赴東鄉收其遺骸哭之慟事聞得贈卹如例祀忠義祠嗚呼三韜當事勢危急甘心投烈焰以死而不爲賊辱亦可

長樂縣志

卷二十六

列傳六

十

忠義

謂志士矣

按大幹之役三韜所帶弁勇三百人同時殉難其得知名者里仁陳朝標龍門高妥二人而已附錄於此以表

忠勇○同治彭志

柯元慶邑武生柯百戶人居會城授督標水師營圓山汎把總署本營千總咸豐癸丑四月土寇黃有使圍延平城慶奉召隨征首先入援與賊戰於城外十里庵力竭被害大兵繼至城圍遂解詔賜

卹如例祀省昭忠祠

同治彭志

陳登標字滿友江田人寄居省城亮功舖由延平右營馬兵拔補左營司外委署沙縣駐防馭兵有法捕盜惟嚴咸豐七年卸防務委署將樂縣汎會賊匪肆擾沙人士以標敢戰多謀稟留在沙防勦屢立戰功嗣聞匪嘯聚洋溪將圍城偕把總廖帶壯勇百餘名扎

營西城外猝遇賊至衆寡不敵力竭陣亡詔贈卹如例祀忠義祠
邱步衢字振翰一字仰周坑田人寄居省城美化舖由行伍出身署
撫標左營守備咸豐三年調赴延平勦匪猝遇賊至力戰身亡詔

賜卹如例祀忠義祠

同治
彭志

王功字績甫號鴻山大宏里人道光癸卯武舉人歷任龍巖漳浦把
總咸豐七年克復歸化等縣陞千總旋署詔安守備十年汀洲戒
嚴奉憲征勦至武平遇寇身先士卒以寡不敵衆死焉事聞詔賜

卹如例祀忠義祠

同治
彭志

江道福字世臻號介卿三音孫邑廩生成豐七年就永安明府俞林
聘適會匪滋事襄辦聯甲防堵事宜下鄉集團突遇賊至被執怒

長樂縣志

卷二十六

列傳六

十一

忠義

罵不屈死之

同治
彭志

節概

明

陳文禹字佩相嶺南人嘉靖六年以貢爲龍游訓導廉正剛介雖閭室言笑不苟與諸生以道義相勉取與一介必慎諸生貧者召至門下餼之見監司不途跪欲拂衣督學使者敦留之竟託微故申

前志致仕去

乾隆賀志

陳安字勉夫西隅人嘉靖乙卯領鄉薦爲衡陽令質直剛方不能阿媚衡山黃御史按浙還過其邑苞苴甚盛以屬吏禮凌視之安不能平發其篋黃白充物遂以狀聞卽棄官去御史亦坐是落職

乾隆

賀志

長樂縣志

卷二十六

列傳六

十二

節概

陳奎輝字克韞別字漆林江田人天啓辛酉舉人授平和教諭行取令雲南姚州歷五載有政聲以親老乞歸福王立召赴南康同知清兵下九江孤城不守被執至軍府數以不從罪仍侃侃與爭旁有爲之解者得放歸居匡山絕頂草舍蕭然取王陽明先生所傳良知錄力辨駁之間道歸江田故里以悲號卒初奎輝與黃石齋相國友石齋築榕壇講學其中特重奎輝爲梓榕壇問業十三則又爲序寤寐齋詩集畧曰陳克韞思致清深才藻敏妙本家學而暢以惠風數百篇皆和美適逸可誦也今載石齋集

同治彭志

鄭允成字祖謙參政岳孫

岳見名臣傳

父彥國學生允成天啓丁卯舉人

數困會試恬靜自守邑令鄭尙友夏允彝居止廉正少許可獨與

允成交厚允成終二人任未嘗一言及私唐王時糧餉不足允成父入貲允成例應授美職辭曰國家多難有能者効力有財者輸金臣子分所當然豈可掩吾父義舉博一官耶閩事敗允成終隱不出臨卒強起呼諸子曰吾死有遺恨銘旌止書前孝廉三字足矣乃瞑

同治彭志參道光通志

陳鳴石字體魁號若雷德隆五世孫鑾曾孫也

德隆景泰丙子舉人歷浦江曹縣上海新

建四學教諭鑾正德己卯舉人霍邱知縣

族鼎盛鳴石獨甘恬淡崇禎癸酉舉於鄉次年會試副榜魯王入閩授禮科給事中時方播越鳴石獨正色立

朝魯王敗杜門掃軌不入城市著有竹溪前集抱冰集共四卷

乾隆

賀志參道光通志

長樂縣志

卷二十六

列傳六

十三

節概

林大乾字用始廷選曾孫

廷選見名臣傳

郡諸生喜讀書能文善射美鬚髯

狀貌魁梧性骯髒與李世熊林逢經張綸輩結文社咸一時名流

崇禎壬午鄉試落副榜棄去是年旋舉武科同社赴賀大乾掀髯

歎曰吾文士也造物吝我一第世受國恩圖報念切安能待黃河

之清借此階進非得已何賀為唐王時以薦授都察院經歷會太

常寺少卿嚴通奉命視師浙江戒行有期而缺其副僉謂非大乾

不可大乾慨然就道諸參贊事悉合機宜魯王入閩命署羅源縣

事潔己字民雖軍興旁午正供外一無所擾尋遷職方主事魯王

敗痛哭以歸後數年卒

同治彭志參道光通志

曾人翰字明克諸生天性剛毅不事浮華授徒多所成就唐王敗人

翰以次應歲貢不就提學行牒促之人翰語役曰汝亦知有不畏死男子曾人翰乎終不出提學置不問未幾病起坐取冠服審視著之含笑而卒

同志彭志參
道光通志

陳希友字朝文號孝兼江田人郡諸生太常卿洙曾孫也

洙見名臣博學

能文章雅負重名魯王入閩薦授兵科給事中數建言不爲權貴所懾踰年魯王敗希友隱遯嘗刺血寫孝經百餘卷以貧故父母未葬藉以報親也後以楚世子成怡株連逮廣東獄人勸易僧服晦官蹟尚可保全希友曰吾世沐國恩致身鎖闥豈容顛沛毀素履且令張陸笑人哉卒於獄著有蓼巖集及詩文多散失同郡高子翼爲舉其喪

乾隆賀志參
道光通志

長樂縣志

卷二十六

列傳六

十四

節概

王挺字子玉五都人文雅尙學垂髫游泮風度弱不勝衣而剛大之氣雖威武不爲屈明亡躬耕山居絕迹城市草屋數椽僅蔽風雨晨昏誦讀不少倦流俗見之亦知起敬偶歲侵逋正供被拘到縣受鞭責有訝而癡之者挺曰吾向爲鬻序中人近恥赴試學册無名則平民也雖被箠何足爲辱聞者壯之未幾斃於虎衆咸謂天道不可知

同治
彭志

劉桓字愈學號志來十六都華厦人崇禎末貢生授連江教諭與福安進士劉中藻相期赴難後中藻死桓被執繫獄備受重刑終不改節後赦爲逸民

乾隆
賀志

清

吳士宏字喈士父日來見循績傳士宏康熙壬子舉人耿逆變作士宏偕蔣桓陳學夔棄家遯跡橘園洲三年中邏騎逕至誓死不屈逆平授連城教諭改永安擢知彭澤縣承凋敝之後減賦役嚴苞苴爲撫臣所齟齬兩江總督阿山劾撫臣不公稱士宏素履端方居官廉慎尋解組歸卒年七十著有對山詩文集祀郡忠義祠子九如九叙文煥均另有傳乾隆賀志

蔣垣字用崇其先本邑人久遷省會康熙壬子由侯官籍舉於鄉值耿逆變逼授僞職垣服藥毀形不告妻子逃嶼頭托星卜治生事平將歸語族弟用乾曰吾半生心血纂集八閩理學一卷鈔以示後不無少補後付梓學者爭購之今用乾家猶有遺稿云按此傳乾隆賀

志入流寓同治彭志註云既是本邑人則止是歸里隱遯耳未可曰流寓註雖云然而傳仍附于流寓茲特改正

陳慶年字聲揚一字肖丞文翥子

文翥見名臣傳

少隨宦京師刻苦自勵年

十三父卒於官獨力扶襯及眷屬歸旣冠以邑廩生中咸豐壬子舉人會試挑取教習侍郎黃贊湯薦教授鄭王端華府中端華厚待之慶年居半月卽辭館大拂端華意資脯不備狼狽至杭劉觀察齊昂留課子弟未兩月髮賊陷杭城被執械至江寧授以僞官不受令掌書記以不識字辭復械歸杭城爲爨下夫備嘗苦楚不挫其志嗣雜賈人中逃走敝衣破屣行至上海附火輪船歸卒於

家同治彭志

陳光斗字芝生先世鶴上人以太高祖西疇讓產遷邑東隅因居焉

父椿壽字鶴舫績學有鄉望廩貢生光斗生而穎異年十二有業灰瓦者爲占駢語云百練文章質存太素萬家覆被道合彼蒼識者覘其不凡事親孝歲大比假館省垣聞父病馳歸不解衣帶者數月邑艱醫慨然曰人子不可不知醫發內經讀之得神解遂精於醫試期迫父促入闈不忍違去乃佯治考篋匿外舍理醫藥無間光緒己卯以第二人舉於鄉主將樂講席甲申法夷犯閩海將軍穆圖善督師長門延參戎幄優餽膏秣不受請以客備顧問麾下望丰采爭結納少所延接然有才必密啓之有商舶誤犯海禁軍吏捕將駢誅悉白出之其人感激致厚饋麾斥令去初穆擬專牘薦大用以無功辭軍務竣保知縣穆內召陰爲治裝要同行強

其出山宦鄂四年不衙參上游禮遇異於僚屬日以刪文授經爲事有諷之輒謝曰余以宦遊耳性慷慨居無儋石嘗措巨金爲人了官虧不責償有故宦貧不能歸柩眷者飲助之時張之洞督鄂患頭風召醫立方疑未服再召謝去謂人曰醫雖小道吾不能枉己徇長官爲進身階且濟物何必在官遂拂衣歸學不務口耳出處以道自任淹貫經傳有創解尤善言易於河圖洛書深有心得講論能析精微不欲以文人名有所構隨卽散棄子姪生徒求零稿不得也尤不喜以醫名噓枯起瘠若桴鼓無成法世人終不知其所祖也

陳蕤字喜人升揚子咸豐辛酉拔貢性磊落年十二試使院提學偉

其文延賓坐問童子聘未蓋時有大紳某物色婿家提學將以蕤應選蕤却之既出親戚以爲懟蕤曰文果可售必不以拒婚失不可售奚用求援以自污識者深許爲有志學淹博尤邃於經其師謝章鋌恒鑒賞之素善飲醉輒科頭跣足就所知劇談其脫畧類如此晚年稍以醫自贍然貧窶者率不取資人咸以爲義卒年五十八

孝弟

唐

林巨卿縣東梅花坊人有孝行葬父周廬墓三年甘露降墓次後應

文行科出仕

乾隆賀志

宋

鄒異字士奇邑西侍中坊人有孝行親歿葬南山廬墓六年有甘露

芝草之瑞元祐三年舉經明行脩有司因改其里曰賓賢坊曰文

行

乾隆賀志

高宗信後澳人甫四歲能知孝讓及長凡所以事親者惟恐不至元

豐四年里人直講陳烈以聞舉孝廉官金紫榮祿大夫

乾隆賀志

長樂縣志

卷二十六

列傳六

十八

孝弟

元

陳仲文字奎甫至正末隱居不仕嗜學能詞章孝友尤篤嘗與族子

潔建義學於藍橋林壑中自是鄉之子弟知所嚮焉

道光通志

明

范御古槐人父瓊洪武十四年由明經薦任黃巖丞以徵糧稽遲論

死御年十九擊登聞鼓乞以身代太祖聞之嘉歎詔釋瓊御竟以

擅擊登聞鼓斃杖下時鄔孟妻王氏亦乞贖夫罪自經死京師為

之語曰范瓊子鄔孟妻貞與孝孰與齊

乾隆賀志 鄔孟妻事詳貞烈傳

柯文基石梁人甫五歲失怙恃依祖母陳氏比長侍奉溫清備極敬

養祖母九十六卒居喪三年衰絰未嘗去體喪葬如禮鄉黨稱孝

乾隆
賀志

黃熙字汝明一字皆山父銅傳見忠義熙天順甲申進士南京吏部郎中仁孝天性初領鄉薦以父老不上春官父歿哀毀骨立竭力營葬登進士後復以母老乞歸養母歿終喪始官於朝以廉謹見稱後獲贈父母卽乞病歸卒之日命其子薄殮曰吾昔家貧治父母喪未盡禮吾雖居官治喪不可過吾親也祀鄉賢

乾隆賀志

陳耀字孟輝一字竹泉晚更字睡庵古槐人年五十僑寓省南臺后洲初讀書得朱子小學深體味而訓釋之由是以之持身教人行動不稍踰矩矱尤喜讀朱子名臣言行錄不干仕進性孝友閭里化之壽九十終嘉靖丁酉巡按李元陽提學江以達田汝成入奏

長樂縣志

卷二十六 列傳六

十九

孝弟

祀鄉賢

同治彭志

陳祐德事父孟簡至孝母謝晚嬰風疾扶持逾一紀寢興不違又侍伯父病五月無倦容提學杭濟檄徵之正德二年貢入太學任廣州府訓導卒年八十二

道光通志

鄭孔信名明允以字行性至孝侍父疾嘗糞祈代無所不盡及歿哀毀幾絕見孤嫠無親疏度力資給與鄉人期卽非己所便必力副之鄭善曰見海峰使人檢過不暇海峰孔信別號也子憲正德丁丑進士連遭父母憂不入私室者六年人稱世孝初與方獻夫善及獻夫以議禮驟貴佐吏部憲謁選相值邸舍一揖而已不復通獻夫謂憲薄己遂稽選期意在阻憲憲終不屈官終光祿寺丞

道光

通志

陳晉昌字鴻翰以字行嶺南人事親孝父伯通道光通志作伯迎年九十餘

時晉昌已老身為滌廁父病殆祇天減算疾為愈延二年乃歿既

葬朔望攜果茗詣塚拜泣風雨不廢以父性愛菊因遍植菊於塋

次乾隆賀志

陳德宗字克脩一字復齋沙京人八九歲時母疾身為枕藉晨夕不

離側及事繼母無異所生厠踰皆躬為浣滌兄弟四人同爨五十

餘年友人林碩夫旅死靈山寺德宗時寓歸化聞即貸金往殯為

挈櫬歸嘉靖乙酉貢任始興訓導尋告歸兄弟之子凡十四人擴

堂宇居之乾隆賀志

長樂縣志

卷二十六

列傳六

二十

孝弟

黃讓嘉靖時父墓為山賊所發質其骨責贖讓罄產贖而葬之乃募

壯士百餘人從督府討賊二子啓愚啓魯死之讓出奇計斬首二

百人降者一千七百有奇賊既滅推功於諸校不受賞而去乾隆賀志

鄭伯達九都人以孝弟訓子孫六世同居邑令夏允彝為詩旌之曰

粵惟鄭氏條分枝散樹德已深六葉同爨動非為身悉捐崖岸匪

惟涵覆又啓迪之豈無細故讒口罔施豈無粟帛敢曰自私淳懷

天造猜疑不貯踵武相銜進止有序文嗣遺風太和懿緒曜族勝

宗焱騰波湧樂在家庭名非榮寵衣絕盛飾居無雕拱干霜植年

萬畝結陰瑞靄如雲南風如薰抱爾子孫振振誥誥乾隆賀志

王恩鴻字子玉兄恩及令粵東恩鴻在家奉母李氏以孝聞崇禎十

七年母病篤割股以療知縣虞祐旌其門曰孝友相師乾隆賀志

清

陳貽謀字克臧江田人明季海寇擄人索贖貽謀父德容被執乞以身代至三閱月凡未贖者十七人賊將盡殺之其渠魁夜夢神曰

陳克臧孝子也無相害厥明釋之卒後復遭海寇焚劫鄉無餘燼

惟貽謀柩無恙人謂孝感所致墓在五都馬臺北壩山乾隆賀志

陳驤字昌奮一字叔舉邑諸生古縣人父兆甲字克鼎前明國子監博士老矣以某甲事株及並左伯周亮工下廷尉驤橐餽三載備極艱辛時西曹新製三木刑多死一日兆甲次當夾訊驤闌入法堂請以身代情辭懇至法司皆墜淚後朝審旋風吹牘入雲中亮

長樂縣志

卷二十六

列傳六

二十一

孝弟

工與兆甲冤俱白驤御父歸與孫學稼鄭宗圭高兆許秘許友及仲兄騶諸名宿脩平遠臺詩社追蹤曹徐驤所著有中軒薊游二

集騶字仲桓老於諸生有偶安集二十卷同治彭志

江子璜字朝雄雲路人母卒值海界內遷喪不如禮言及輒流涕後與父合葬躬負土成墳廬於側性好施里有患難多方拯卹貧不

能自存及無力婚葬者悉周之卒祀於鄉乾隆賀志

王萬年字眉友西隅人康熙十六年以貢授上杭訓導事繼母陳備極孝養母病二年侍湯藥左右不離以產讓弟嵩年鄉間有爭財

者聞萬年言愧而止卒祀於鄉乾隆賀志

鄭兆奎字學悅陽夏人邑諸生天性醇厚以孝友聞母病三年親侍

湯藥不離左右待人無忤色親朋共飲其和居家課督子孫多克
成立卒年八十五乾隆賀志

李詠字永言邑廩生東隅人孝友端方撫孤姪如子爲文獨出所見
試輒冠軍衛胡蔣三邑令歷延爲義學山長多所成就表其閭曰
士林模楷邑有公事無不毅然力任著有五經纂要乾隆賀志

陳佶甫字孝允父鳴瑜明副貢生佶甫事父母以孝聞時海氛初靖
同堂弟姪多流徙四方佶甫爲之築室使復其所有兄孝達早亡
嫂孀居無措佶甫撥田給之並爲擇嗣康熙丙子歲荒資舉火者
甚衆乾隆賀志

鄭敬賡字復言西隅人性孝友母病割股以進疾遂瘳雍正十年藩

長樂縣志

卷二十六

列傳六

二十二

孝弟

司張以孝友可風旌之乾隆賀志

林慶庭字章祿金峰人少孤事祖父母孝養彌篤生平以古道自持
待人無忤色知縣殷鳳梧旌曰品行端方乾隆賀志

鄭良智字祖睿西隅祥厚人與弟良琬字祖英相友愛竭力事親知
縣梁旌之曰昆友承歡乾隆賀志

楊元挺字永哲一字于岳邑諸生犀村人性篤孝母病偏枯親奉湯
藥五載不離床側朔望稽顙求以身代中丞張伯行聞其賢徵入
書院參訂所纂書籍張志棟延爲普文書院山長成就甚衆著有
學庸正宗古文評本及詩文集乾隆賀志

吳九如字質侯邑諸生父士宏傳見節概九如有夙慧博學能文天

性孝友長於經濟從父宦游十餘年隨時佐理大著循聲祖柩未葬弟妹已長父以兩袖清風家計日絀九如鬻妻奩具以成其事居常分甘讓肥不私尺布士林重之

乾隆賀志

歐陽文字詩同邑諸生十六都人孝友篤學父母終家貧不能葬負土成墳事兄猶父歲所得館脯悉以分兄囊無餘積授生徒以簡言闡發理要多所成就著有四書集說五卷

乾隆賀志

石鐸十二都人乾隆七年七月間暴雨滂沱父漂於水奔救不及鐸觸小樹抱之見父隨水去鐸舍樹赴救均溺死鄉人哀之

乾隆賀志

林天孟沙京人幼失怙甫十歲母病篤割股和藥以進母隨愈生平仗義脩橋道息爭訟知縣以孝義可風旌之

乾隆賀志

長樂縣志

卷二十六

列傳六

二十三

孝弟

方大教字爾宗八歲喪母哭不絕聲與兄入山採薪養父而獨任其勞共樵則獨荷以鬻共爨則獨飪以獻嘗以野蔬自給而留飯以飽父兄有招以賈者以父老辭晝則負擔市上夜則臥父旁承歡二十年父卒服除猶朝夕哭泣未幾兄又病焚香告天請以身代割股和藥以進病遂愈時大教所聘林氏近三十矣以父未葬不娶且思鬻身以葬親同里張孝仔義之贈以金使葬父而後娶乾隆三十二年知福州府蔣允焄旌其閭

道光通志

林崇疇字文添祖謙光見循績崇疇事繼母陳氏病篤割腕肉和藥以進母疾遂瘳乾隆六十年饑石米值錢七千崇疇以家藏二百餘石分賑族戚之窮乏者

道光通志

彭志作宗疇

張金鼎字孟彝西隅人素有孝行父死日有羣鴉環繞其居事聞督

撫以孝行可嘉旌其閭

乾隆賀志

陳天俚青橋人性孝友九歲母病奉湯藥必親嘗母卒一慟而暈每

忌辰歲臘淚輒沾襟父年八旬常扶出入呼爲人杖年二十六苦

讀卒族黨惜之

乾隆賀志

陳時夏字道定一字常于古縣人乾隆乙卯舉人少失怙節母高督之學必閑以禮法十歲從叔父讀書卽知發憤勵學不苟隨流俗步趨同學皆以爲迂平日嘗以不逮事父爲恨遇忌辰必素服哀奠奉母悉得歡心事叔父如父終身不衰甫冠入邑庠讀書鼇峯書院主講鄉賢孟超然叩所業深器重之時進講堂勗之曰知志

古勿泥古知正學要力學時夏自是益屏絕紛華體認實理事事必精察而力行未壯秋捷以母老不與計偕授徒里中推誠相與從學者必先示以濂洛關閩之正敦倫紀辨義利端趨向隨材造就不苛以所難從游之自遠方來者至硯席無所容易簣前一夕猶強起評文藝題其末曰讀書不勤則學荒學術不端則心壞此際須大有把握年四十有六卒學者稱爲常齋先生錄所遺書有學庸繹註二卷周禮要解二卷榕軒詩存一卷

乾隆賀志

陳泰瑚字恒揚一字鼎石岱邊人太學生少孤事母孝朝夕奉養唯謹病侍湯藥不離左右出與兄謀生計少有獲必歸告母母歿哀毀骨立未幾兄又歿無子以長子爲之嗣待寡嫂禮敬不衰性敦

篤好施與歲飢減糶遇疫施棺里人德之學使彭蘊章旌之曰孝友可風卒年七十七子八人長鴻材字淑寬一字岱軒邑諸生繼伯兄嗣純樸嗜學與弟鴻音鴻泉等相友愛年六十始析居諸弟以產當兩股均分請鴻材曰吾以序長承繼大宗此不得已之事若因此坐獲厚貲非吾心也及分產少自與家延師五十餘載待先生忠且敬今其後嗣科目蟬聯人以爲敦睦之報云

同治彭志

江三音號審齋少失恃父諸生舌耕授徒中年困於病家計鮮措音採樵鬻以供養侍湯藥外衣踰厠皆躬滌必潔夜則諷誦不輟父再三諭甫就寢歷二十年父歿哀毀踰禮戚友憐爲之殯躬負土壘石以葬廬墓側三年服闋出就試補弟子員嘉慶庚申舉於

長樂縣志

卷二十六

列傳六

二十五

孝弟

鄉大挑授教職補福寧訓導攝正篆下車倡新學宮歲餘監脩弗倦與諸生講學論文無不樂其和易然性嚴介不可以非分干惟事屬門牆者必力持不少貶調平和教諭課士益勤著左史論文二十卷未梓卒於官

道光通志

陳觀瀾東隅人父良琨邑增生以苦學致病瘵觀瀾寢食不自安日籲於神乞以身代割股和粥以進父歿哀毀骨立姪肇經幼孤貧不能讀瀾罄所積爲備脯資俾卒業成諸生壯爲授室長樂縣知縣手書孝友傳芳旌其門

同治彭志

方英穎字隆文幼隨父諸應幕游肥城逾年令去官諸應飄泊無依以病歿客邸英穎年十五搥胸號泣痛不欲生勉營喪紀鬻衣裳

負遺骨歸冒風雨忍飢寒道出蘇州沾疾月餘資盡館主婦屏之
出舍英穎抱骸哭道旁達旦值長官過稔其故厚贖之並給牒護
之歸奔走數千里歷十閱月備嘗艱苦後四十年學使吳孝銘採
輿論旌其門曰髫年至性邑人王登三爲之傳

同治
彭志

鄭敷亨字元齡雲路人父行彪秉性嚴毅明取與慎言笑族黨重之
有以小忿啓釁者得其一言事輒解精算學著有算經匯源敷亨
幼孤隨母育於省城舅氏因家焉游明經陳本欽之門本欽深器
之妻以孫女兩應童試不售以家貧親老棄儒習幕入都充院供
事秩滿候選府經歷聞母病馳歸侍奉湯藥衣不解帶者累月夢
神賜以藥疾頓減自是杜門養母先意承志能得歡心與伯兄敷

長樂縣志

卷二十六

列傳六

二十六

孝弟

昭相友愛置田三十畝盡以歸兄不分儋石素儉約而好施與戚
里有急每傾篋周之或質錢以應於貧士尤矐矐焉有張姓者久
賃亨屋亨廉知其苦讀免其租值又量爲飲助學以有成生平絕
嗜好喜藏書得善本必購以歸曰以此貽子孫今其後嗣科甲蟬
聯皆能讀祖父遺書論者以爲積善之報

同治
彭志

黃汝楫字景麓一字樸園青山下人邑諸生質魯好學遭遇艱屯晝
負薪而夕讀書食力奉親連丁內外艱哀毀備至以傷感病明眇
一目弱冠卽授徒四方積束金爲諸兄婚娶撫諸姪如己子一門
之內怡怡如也生平尙節操重氣誼不輕取與不妄交遊誘教生
徒先品行後文藝遊其門者無論資稟高下皆能成就其貧而無

力者咸助以膏伙不取束金一時知名士如黃榮庚黃翼爲皆出其門晚始娶室旋病瘵卒以門人黃翼爲貲贈中憲大夫

張怡家貧苦讀每飯常自節食以讓父兄己茶湯充饑早歲卒

道光通志

林仰先親老善病家貧約衣食爲醫藥費躬自服侍左右不離親歿哀毀逾恒水漿不入口者累日營葬躬自操作歷時罔懈撫弟妹均成立經營婚嫁後猶不析箸遠近墳塋祭掃必謹隳壞者必竭力脩理戚友告貸者傾囊不靳常脩橋路施藥茗以便行人道光二十九年旌獎

道光通志

林仰先字道平古縣人父業農家貧喜讀書道平體父志勤苦力學旦晚必侍側親奉菽水有長兄客連江久不歸父思之時流涕仰

長樂縣志

卷二十六

列傳六

二十七

孝弟

先數往泣跪而挽之歸爲娶室以安其身父樂之曰吾非道平幾無長子矣鄉黨稱其能承父志咸豐元年入祀忠義孝弟祠

同治彭志

案通志所載林仰先事實與縣志互異或兩人抑同名無從查核姑並載之

蔣藻嶼頭人事親孝髫齡喪父哭泣盡哀常不令母知人問故曰恐傷母心耳家貧爲漆工以奉母中裙溺器洗濯必躬至老不倦母年百歲卒喪葬畢嘆曰年七十不能婚吾親將不血食何如長侍地下哉遂自具殮衾服藥而死

同治彭志

林樹馨字孝冲一字在霄竹田人邑諸生肄業鼇峰與余潛士何則賢以氣誼相友重一日讀游子吟潛然出涕曰吾亦人子也奈何別慈幃而虛名是戀遂歸養母躬親侍奉不假手婢僕母歿哀毀

逾節忌日哭泣盡哀以爲常事長兄如父與人交尤見肝膽有陳某因貧棄學樹馨飲助之俾卒業焉

同治彭志

鄭成彪字其勝一字炳山邑庠生北湖人博學能文尤篤內行事親備極色養親沒躬營兆域祭必盡禮每值諱辰心常戚戚與諸弟共爨五十餘年始終無間言治家嚴肅常集先哲名言有裨身心者書之座右爲子孫觀法生平不驚聲華自安義命教授鄉里不計脩脯視生徒無殊子弟卒年七十八

同治彭志

鄭思權字素守古槐人父汝誠諸生敦品植行鄉里稱爲長者權幼知孝讓年十一喪母哀毀如成人事繼母尤謹父病祈天減算及居喪哭泣盡哀遇忌日輒悲戚伯兄善病飲食藥餌親奉十餘年

長樂縣志

卷二十六

列傳六

二十八

孝弟

不稍懈撫愛羣弟董勸並用俾各成業歲得館穀悉以資兄弟生平有志正學嘗詣建陽慕朱子之鄉欲移家就居以母老兄病不果乃考訂道學源流採其嘉言懿行講求不倦其卒也士林惜之同治四年邑人陳中翰萼芬爲請於朝旌焉

同治彭志

高齊雲職監生遷居省垣南關外醴泉舖早失怙椎心泣血每以未獲逮養爲憾家故貧自飲糜粥而供母甘旨必備母多病每夜焚香禱祝及母歿哀蹙異常嘔血數升以勞瘵死邑人爲之請旌焉陳鳴霄名解勉西隅人幼失恃哀毀備至父方振治家嚴不如指者鞭撻不少貸霄先意承志獨得歡心侍父病衣不解帶者數月旣歿喪葬如禮鳴霄素經商得贏必歸兄不私一錢年四十以積勞

卒知縣秦煦給以匾曰敦孝篤義並爲請旌同治六年建坊祀於

祠

同治彭志

張柏字可同一字從寮東隅人少孤母鄭氏病臥床簣者十一年柏承奉無懈及卒祔葬父塋日必詣冢拜泣風雨不廢數十年如一曰有三兄相繼卒視諸姪如己子共爨六十餘口內外無閒言待族鄰和而有禮嘗途拾遺金伺還其人學政邵亨豫表其門曰孝友可風同治八年旌

同治彭志

吳三英字存禮一字芝田西隅人國學生善畫蘭天性純篤七歲喪母哀毀如成人事父以孝聞妻王氏亦割股療翁疾後其父失明英以舌舐淚以口哺飯者五年族黨稱之同治八年旌

同治彭志

長樂縣志

卷二十六

列傳六

二十九

孝弟

柯良貞岱西人天性純篤幼失恃十一歲而孤哀毀若成人善事繼母先意承志問視惟謹母病衣不解帶者彌月待季弟友愛備至長任家政凡事必稟命而行飭躬勵行恆以辱親爲懼勤學能文蹇於遇艾年猶刻苦異常語人曰非敢躁進恐負篝燈母訓耳年

五十三卒同治八年旌

同治彭志

陳尙洙東隅人性孝友幼知禮讓不與諸兒戲人詰之答曰恐致口角辱及父兄耳年十六父病篤祈天減算乞延父命父卒哀毀逾常事母尤謹與兩兄聚處一堂怡怡如也因顏所居曰怡怡室年二十六以苦讀癯瘵疾同治八年請旌

同治彭志

鄭孚誠字茂邦一字詹巖邑諸生西隅人家貧性至孝早喪父哀毀

備至弱冠舌耕竭誠將母邑侯李鏜素有知人鑒下車觀風拔取第一廉知其事母孝月給米炭孚誠因執弟子禮請業之外不干一私李嘗寒夜步其館見案頭有訓徒律句八章訓子格言四則尤嘖嘖稱羨每語人曰鄭某尙德人也其見重如此光緒十八年大府上行實於朝獲旌如例祀孝弟祠長子煥經號籍園增生三子煥章號超徑歲貢生候選教職迨授沙縣訓導而煥章已卒孫榮元號彝圖附貢生

同治彭志

李斯融字學昭沙京人性肫摯重然諾家貧鬻麵營生族祖顯定見其誠實不欺異之假厚貲俾商於蘇時融年方十九不十載致貲巨萬富有田宅融生三月而喪母父暮年雙瞽奉養周至晨夕侍

寢處不離左右盥櫛滌溺必躬親事繼母能得歡心繼母生三子融友愛篤至延名師課之讀不惜重聘諸弟既壯有室以食指繁請析產融愀然曰吾非不計及此所以遲遲者欲弟專心讀書博一第以顯揚父母耳既以爲請吾何靳焉遂檢券籍而付之腴田美宅悉以讓弟而自取其荒頓者今其鄉有兄弟爭產者人輒舉之以爲鑑卒年七十以子駒貴贈文林郎

鄭景燮字宏芳首占人廩貢生父元經道光乙亥副貢景燮以辦團出力獎五品銜以訓導用家無遺產與兄寅同爨十餘年內外無閒言寅任浦城教諭卒於官景燮聞訃星夜奔馳七百餘里護其喪歸營葬如禮敬事寡嫂撫姪如己子母疾焚香籲天願以身代

學使秦綬章以孝友傳家表其廬以子受康贈朝議大夫

陳仕端字文石石門人生未週歲而孤事母張唯謹母患乳岩症食必滋味痛乃少減仕端極力營致躬調以進雖風雨無缺如是者三十二年如一日晚歲授徒鄉里不計脩脯貧者德之

林廷璣字中立號子璇又號述齋廩貢生候選訓導以辦理團練出力保教諭父冠英年三十喪妻不再娶同治閒以義夫旌於朝廷璣七歲喪母哀毀如成人父病親侍湯藥衣不解帶者三月居父喪斬衰苦次哀動鄰右既葬廬墓三年教授生徒家雖貧不計脩脯游其門者多底於成鄉俗好鬪動以細故成大獄株連不已廷璣憫之酌採藍田呂氏鄉約籲請大府撫軍王凱泰韙之正擬檄

縣遵辦而撫軍改駐台灣事遂中止迨制軍何璟蒞閩始得飭縣舉辦邑之有鄉約自廷璣始光緒某年舉孝廉方正年五十卒著有大學圖說鄉約成規述齋全集若干卷藏於家制軍卞寶第奏准祀郡鄉賢

陳聲琚字瓊勉西隅人早歲失怙恃與兄弟同爨四十餘年無閒言改建宗祠脩築祖墓輒獨任其勞尤不惜捐貲以倡經理吳航書院欸目支應無缺凡育嬰助葬諸善舉皆踴躍襄事焉邑令徐承禧旌曰藝苑宣勞

林謹純邑廩生仙橋人性極孝父病衣不解帶者六月藥必親嘗卒年三十六

黃位中字立人一字已峰同治乙丑補行甲子正科副舉人父經商於外位中事祖母孝養無虧二十年如一日祖母病焚香祝代獲以延壽父晚年家居多病位中日侍左右十年不應舉父既歿母哀戚成疾思食鱠魚位中旁皇無所得**跣**足至小社鄉適漁人網得一鱠位中亟買之而告以故其人駭曰此魚久不見今一舉網而得殆君孝感所致也家故貧教授里中供母甘旨未嘗遠離省垣有以重幣聘者輒却之尤篤友愛教養諸弟無不周至三弟某欲赴越南貿易位中以路遠阻之弗聽繼之以泣日盡腫夜夢護弟同往沿途風景歷歷在目弟歸叩其途中所歷一如位中夢叔某食指多窘於生計位中自節縮衣食時以錢米飲助之生平敦

品勵學非公不至公門授徒多所成就年五十六以候選教職卒於家光緒辛丑旌表祀孝弟祠

許履仁號梅陽二十三都大洋人邑庠生事親以孝聞父歿寢苦枕塊哀毀骨立足不出戶者三年居母喪亦如之生平操行端方動循禮法里有爭輒就履仁平曲直而事無不解者

陳承興邑東隅人幼失怙家貧與弟承珠俱生有至性以母早孀苦節竭力孝養母病承興割股和藥進獲愈承珠待兄弟尤友愛兄乏嗣以長子脩爲兄後弟承彩早世撫遺孤如己子人稱其孝友萃於一門承興承珠均以脩貴贈奉政大夫

劉菁字子英東隅人光緒己卯舉人性端重和易好讀濂洛關閩遺

書於心身性命之學辨析精微躬體而力行之居恆寡言笑氣粹貌溫恂恂不露圭角時閉戶手一編罕聞外事顧戚族有以急難告者則必力任其艱事親飲食衣服必豐且潔視而後進先意承志得老人歡居親喪不飲酒不食肉制服一準於禮孺慕逮乎終身蓋其孝行出天性也以大挑教諭未補官卒士論惜之

王景灼字杰堂一字傳俊邑諸生父際會傳見方技景灼弱冠失怙恃事叔秉樞唯謹跬步追隨出入必告家故貧授徒於外所得館穀悉歸於叔一錢不入私室歲時假歸侍叔寢側扶持抑搔無倦容與弟景暉相友愛工書尤善山水有倪雲林筆意

劉子才字可三東隅人幼岐嶷嗜學工制義光緒己丑舉於鄉試春

官輒報罷歸而肆力於古文辭所作傳序各體胥得史漢矩矱生平篤內行親歿卜兆躬負土而雜傭作以是勞瘁病幾殆終而力疾襄成葬事焉居鄉操履端介邑令陳受頤劉敦華咸禮重之然子才惟與商榷詩文未嘗以他事干請其操行清介有如是者嗣以大挑二等署莆田教諭卒於官

石暄字槐蒼古槐人父廷禧性友愛以兄弟散處爲憾出己產共之暄事親孝事兩叔尤謹與諸弟處怡怡然壯歲補弟子員旋食餼授明經署邵武學教諭邵本山邑文風素凋敝暄以振興爲己任召諸生講學嚴課程文風爲之大變未幾丁嫡母艱歸痛哭自搗恨不得親侍湯藥時生母在懲前痛不復出山日惟承色笑爲事

體素羸弱盛夏猶重襲蓋慮病貽慈親憂也嘗築妙遠樓爲讀書所著有後漢書精華錄戰國策精華錄建游筆記冷齋日記諸書卒年四十八易簣時猶以善事慈親諄諄囑家人云

高紹曾字莘農龍門人省居事母孝一日不得母歡心弗怡也先世業鹺弟秀巖實主其事適洪楊亂蔓延閩浙鹺業銳減秀巖以課虧陷獄紹曾詣官請代繫秀巖執不可紹曾曰汝才勝出事或得解卒代之繫三月貌逾豐蓋入獄時預藏程朱語錄日據柙床讀夷然不以爲意也後秀巖謁選官浙西急病卒紹曾聞赴卽就道備極艱阻取其孤孀並旅櫬歸居恒對子弟述先德兢兢然惟恐墜家聲卒年五十二以子鳳岐而謙誥贈光祿大夫

長樂縣志

卷二十六

列傳六

三十四

孝弟

曾家禧字心如感恩人父歿六日而家禧生事母至孝母病侍湯藥衣不解帶者六十餘日母歿哀毀骨立兄早逝禮敬寡嫂撫姪如己子髮逆之亂上流浮尸蔽江捐貲立如心社購櫓築塚瘞之好周人急貸者無不應病革時悉焚其券卒年六十八光緒三十二年以孝友旌如例

林懋中字勉甫沙堤人省居幼失恃事繼母以孝聞居父喪哀毀盡禮與弟懋功奎輝鐘如相友愛鐘如早世撫其子女恩恤備至以次畢婚嫁奎輝祇一子忽失踪逃於禪懋中四出尋覓逾二年得之僧寺正在受戒相見之頃涕不能仰携歸爲之娶婦以延兄嗣同治初年髮逆竄汀邵省垣戒嚴倡辦團練人心以安鄉鄰爭訟

輒出資解其紛以故人咸信服之宣統三年祀孝弟祠

林秀彙字貞臣厚福人國學生性孝友母病困床蓐舉動非秀彙不當意如是者五年母卒見遺物輒哀泣事長兄嚴謹有應白事亦訥訥不出口秀彙天姿聰穎讀書見古人嘉言懿行必引以自勵然數奇以苦讀患癆瘵卒年二十七

林紹天字思明母趙氏病篤割股和藥以進疾尋愈

李國儀字咸統仙山人父病革割股和藥敬寡嫂張氏至老不衰

林振燕東林人與弟振鮑厚相友愛母病割股進獲愈復延壽二紀王貞鰲寄居后嶼母病篤割股以進疾尋愈

鄭昭淦六歲孤母病割股和藥進之子國煊亦割股以療父病

長樂縣志

卷二十六

列傳六

三十五

孝弟

林嵩年字亦統號壽庭林開人邑諸生父病籲天願以身代割股以進父愈

陳書馨字尚青一字雨蒼監生性耿介絕奔競居家有禮法事父母雖壯如孺慕處昆弟間怡怡如也生平篤學一應鄉舉未售遂不復踐場屋督課子侄濟濟克有成閩縣李熙貧將廢學書馨不受脩脯而課之讀後成進士嘗拾遺金守還其人鄉里爭訟不可解每得其一言而定卒後子孫猶遵守遺訓云

陳瑞烺號耀庭岱邊人亦瞻第三子也早孤事寡母晨夕弗離左右母歿後視長兄瑞唐如父嫂猶母兄病危呼籲請代兄亡家無長物撫孤姪君謀如己出督之學底於成宗黨以孝弟稱之

義行

陳

嚴光十三都人大建初捨宅為光嚴寺捨田為湖溉田四百餘頃為

鄉人利即今西湖是也

按劉則和舊志云嚴光居紫微峯下晉建元時人家富好義常貸錢於人不責償只

令立券結來生緣遠近咸稱長者時有漳人乘驢詣其家貸錢數千緡以驢載去至鶴嶺驢忽不行策之作人言曰子勿策我前生向子貸錢今為驢以償債期已滿不可策矣漳人悟載錢詣光還之光子恭商販揚州次江滸遇漁人鬻龜市五十枚放之光在家忽見有披黑衣者五十人送緡錢五萬曰君子恭揚州所附也恭回詢之云未嘗有所附惟於揚州放龜五十枚黑衣送錢毋乃是耶於是捨宅為寺捨田為湖一日有鄉人客歸黎明路經鶴嶺遇光乘輿扈從甚都家人從後發如赴任行裝及至里中始知其飛昇也錄之備考乾隆賀志

唐

長樂縣志

卷二十六

列傳六

三十六

義行

林鷗字祥鳳方樂里人開成中進士為倉曹參軍大歷中因南郊沙

合捐田築濱澗二湖溉民田七百餘頃妻趙氏亦捨奩田為湖人

呼林婆湖四里民德之祀於皇恩寺又立廟湖旁

乾隆賀志

五代

房長者名洗十都人捨田為桃枝湖捨宅為大澤寺鄉民祀之

乾隆賀志

宋

鄭綱字舉之沙京人本里湖塘路一帶苦泥瀋綱捐貲鋪之并造石

橋

乾隆賀志

黃昭字惟明一字恪溪青山下人處己清簡而好施與所鋪石道不

下三十餘里如本鄉及羅畚界牌坊兜陳坑嶺陽夏等處石刻俱

在至今利之同治彭志

林從世性好博濟因挈家貲遠游治平間至莆田聞同邑錢氏女築陂於將軍巖下弗成死之乃相溪下流於溫泉水口築陂捐貲十萬緡以給其役時人因號爲十萬陂陂垂成爲潮勢衝激而壞後侯官李宏築木蘭陂始克成功然實由錢氏女及從世開其先邑人立祠陂上祀李宏從世與焉道光通志

元

陳有霖字希說藍田人性恬退輕財仗義至正中築鄉約堂於藍田書院之旁中祀先聖以朱呂二先生配朔望舉行藍田鄉約擇鄉之長老爲約正集鄰里子弟講學其中時人名之曰義學嘗與歐

長樂縣志

卷二十六 列傳六

三十七

義行

陽佻往來論學尙書貢師泰爲作義士記乾隆賀志

明

高壘字德滋一字東峰伯齡子伯齡見廷忠循良傳生平端靜敦敏樂善不倦

父俸貲悉讓於弟族兄弟有鬻子者爲之贖歸孱弱者黽勉護掖之俾植其生宏治辛酉領鄉薦任安仁令懷節勵行未嘗妄取一介留心民瘼晝夜不少休及卒篋中惟敝衣數襲士民哀慕之祀於鄉乾隆賀志

李長孫字元善沙京人讀書好義樂施不倦鄉有貧不能葬者出貲營之凡數十人里有田數十餘頃低者患潦高者屢旱長孫捨田濬溝二百餘丈名福田溝又濬舊圳名興利圳後以子騏貴封修

撰壽九十二乾隆賀志

董巖字建南諸生二十四都鼇峰人好義周乏置義田以贍宗族邑

令孫濂著彰德篇以嘉之乾隆賀志

姜穎楓林人輕財好義嘗出田二十七畝爲族屬諸生膏伙資乾隆賀志

陳振龍寄居會城南關外達道舖萬歷初沿海經商至呂宋見高岡

廣野匝地青籐詢之士人云此薯也生熟皆可食試之甘而脆思

中國得此或可代糗糧但夷禁嚴種靳弗與龍啖以利勾其籐數

尺歸種之紗帽池旁子邑庠生經綸以父所得種陳六益八利及

種法獻之巡撫金學曾檄所屬郡如法栽種歲大獲民賴之名曰

金薯清康熙間四代孫以柱帶往浙江鄞縣種焉大有成效其子

長樂縣志

卷二十六 列傳六

三十八

義行

世元籍閩縣貢生復與余瑞元挈種至山東膠州膠地早寒種不
易活元每歲補運教以藏種法隨遣長子雲次子燮運至河南朱
仙鎮及河北等縣三子樹由膠州運入京師齊化門外通州一帶
所種之處利倍於穀迄今食其利者數百年世元著有金薯傳習
錄捕蝗傳習錄行世論曰龍之功宜隆食報其子若孫克承世業
廣濟民生亦豈易得聖人於蔬食菜羹瓜祭
重本始也世人於薯之入中國多不知始於何人故功鬱不彰如
知龍也黃衣黃冠報賽歆祀彌阡匝陌將接踵不絕矣同治彭志
清

陳奮鵬大宏里人性剛方負經濟才奸民歐子禧等導海寇劫諸鄉
奮鵬集衆殺之後又有寇掠婦女據奮鵬館舍爲巢奮鵬伺其出
盡釋之焚其館舍寇信爲被災不之責奮鵬徙家厚福有甘藍赫

三鎮聚嘯馬山官司將文石廬舍盡燬奮鵬獨以徙免衆服其先
見云乾隆賀志

王德勛字我山諸生居梅花所性聰敏學問淵博夙負大志時飛沙
與梅花城平德勛率所軍民挑之役者有碎我山肝腦之怨不逾
時海寇攻城月餘不下全城獲免又有恩在怨銷磨之頌著有梅

花詩賦載藝文乾隆賀志

林維揮字弢奇前林人慷慨仗義順治初海寇擄梅花文石男女共
二十一口維揮悉出貲贖之知縣韓武及衛建勳兩舉賓筵五代
同堂卒年八十六乾隆賀志

陳繼嗣字亨達一字玉瓚邑諸生輕財好義設家塾生徒來學輒資

長樂縣志

卷二十六 列傳六

三十九

義行

膏伙假親鄰以屋並周其匱乏死則爲之殯葬見逋糧者屢受箠
楚卽未謀面亦代輸納以子天立贈文林郎同里陳爾枝捐書田
爲子姓延師肄業膏伙又置祭田以備烝嘗立家規二十則俾子
孫世守之同治彭志

陳守泰字而一西隅人一門孝友樂善好施壽百歲五代同堂康熙
戊申舉鄉飲介賓方伯楊廷耀旌曰五世德星知縣陳諧顏曰百
歲翁弟知希順治初辟授廣東曲江令子善聘年亦八十六並舉

賓筵乾隆賀志

陳仕雅字道月府學生十四都人性孝友祖祠墳墓時加脩葺與弟
道履白首同爨族鄰有爭訟多所勸息一日向佃戶取租佃者怒

目肆詈仕雅不校而歸少頃佃者墜水死有嗾之詐嚇者其家人曰吾逋租反辱業主奈何復以屍嚇之其大量服人類此年八十縣舉賓筵

乾隆賀志

陳長祚字亨穀十六都人孝友敦睦有族兄貧甚往浙貿易因家焉嗣夫婦俱卒子幼長祚爲挈櫬歸撫其子如己子長爲婚娶且給之產又有舅母早寡中表幼長祚迎養於家教訓成立衆皆義之

乾隆賀志

陳長煥字子章性篤實從不作欺人語與柯順耳異姓同居歷三世男女各數十口無間言子琦另有傳

乾隆賀志

陳洪潢字仲春太學生五都人商於洋鄉人受惠者不計捐千金造

長樂縣志

卷二十六

列傳六

四十

義行

湖州寧波兩郡浮橋建本邑廳事捐金四百又捐社穀四百二十石巡撫張伯行以尙義可嘉旌之別立五都附一圖戶永免徭役

碑豎縣堂側

乾隆賀志

林廷謨字明經二十一人居西隅醇謹好學補諸生應鄉闈二十餘試邑有公事輒傾囊倡成

乾隆賀志

林嗣榮字斯獻性豪曠所見者大不屑屑爲自己謀嘗謂族人曰吾族以海爲田不如以土爲田捐斥地四百餘畝與姪孫申甫董砌三塘計成田三千餘畝初稅鮮蠲率以給單稽遲貨多棄地嗣榮訴於官並豁海鮮諸稅至今賴焉子瓊蕤見循績

乾隆賀志

王用亨字存嘉二十四都人謙謹有德好施與族有貧不能娶者飲

助之里有偷兒入其室亨故作警效聲使聞而去終不言其姓名

乾隆賀志

董逢帥字爾謀二十四都人性孝友輕財尚義鄉有田數百畝水道

淤塞逢帥倡捐開濬早潦藉以不虞子紹安乾隆丙子舉人乾隆賀志

林毓鶯字有煥感恩人敦族睦鄰康熙初南陂壞出貲倡脩知縣衛

良佐以樂善好施旌之乾隆賀志

嚴來字常有一字二酉父尚英明諸生鼎革後絕意仕進杜門不出

來少承庭訓博洽工文補學官弟子員敦孝友重然諾邑令器重之有大事輒諮訪而後行凡曲直互持將赴官訟理者經來排解莫不心服有某氏兄弟爭產來引大義喻之咸感悔人目爲漢王

長樂縣志

卷二十六 列傳六

四十一

義行

烈治家嚴課子義方困於場屋未竟其用士論惜焉子夢兩傳見

循績乾隆賀志

高文煌字世昭號新名邑諸生二十一都人順治初里有巨寇聚衆劫掠新名獨拒之賊焚掠其家新名上控佟中丞因獲巨魁斬焉

後行經藍鋪爲餘黨所支解里人哀之同治彭志

鄭嘉謨字祖若一字芝田東隅人孝友樸誠好施與戚族待舉火者

甚衆間有逋欠力弗能償者嘉謨輒焚其券某與某賬目不清訟

於官嘉謨陰代爲償以平其事乾隆賀志

林長佶字撫行十八都人孝友孚於里間時困海氛遷界族多流散

長佶爲之葺室廬鳩子姓卹困濟乏毫無所吝乾隆賀志

柯順耳字治齋嶼頭人府學增生性醇謹好行善事里有高某者遺七棺不能葬順耳代營之脩西坑掩骸千計康熙戊子有總鎮夫人某氏發願脩尼庵一日遺啞尼脩庵費密裝米袋中尼至中途日暮無賴輩欲攘之適遇順耳斥之而止引尼到其家開視米袋計將值五百金次早送尼歸庵點交袋中物並不告以姓名而去素與陳長煥友善三世同居人稱爲異姓同胞子瓊以舉人任湖廣雲夢襄陽等縣皆有聲

乾隆賀志

謝清苓字謹脩一字云美太學生議叙州同居會城端方質直事親始終盡禮友於弟兄讓財推產無少吝有叔無嗣清苓事之猶父里有貧者多資給之遇橫逆輒以禮化獨脩郡學 文廟創嵩山

長樂縣志

卷二十六

列傳六

四十二

義行

書院濬本邑文洽浦皆以身先乾隆二十三年以急公輸餉恩賜

品物

乾隆賀志

陳文德字懋來一字脩齋國學生潭頭人寓會城幼孤有遠志祖遺田宅悉推與伯叔而家漸起自奉儉樸施與不吝歲延師里中子弟可造者輒助膏火凡廟宇橋道多鼎力捐脩邑文洽浦久湮倡捐砌濬中丞周學健旌曰義充鄉國

乾隆賀志

林佳晃字允照厚福人輕財好施脩本里橋道又造連江蓬崎道今呼爲允照道康熙六十一年以遵例急公授儒林郎

乾隆賀志

林朗亭字靜昭二十三都人孝友端方五世共爨一門皆脩儒業朗亭獨持家務好施恤患和族睦鄰至今子孫猶服其教

乾隆賀志

高岱字守東父于岡見循良岱治家嚴肅以耕讀課子嘗築隄岸障

溪水潤田又捨租西石巖寺殊有長者風

乾隆賀志

卓至尙字義哲仙山人性篤厚尤敦宗族倡建祖祠不辭勞瘁早年喪妻生男世潤甫四月誓不再娶曰吾恐兒子著蘆花也又爲外祖父母營造墳墓人稱其義課子孫家法整肅康熙間薦舉賓筵

乾隆賀志

王應元字茂任感恩人舉明經慷慨好施周貧濟乏里有喪不能舉者應元輒贈之子德建庠生著有巽齋集草孫韶鈞領鄉薦人以

爲陰德之報

同治彭志按選舉注例貢生王應元乾隆己卯舉人王韶鈞均作三溪人

鄭珩字祖士西隅人國學生雍正二年奉文廣弟子員額郡屬閩侯

長樂縣志

卷二十六

列傳六

四十三

義行

長樂福清爲四大學額珩偕周元林琮姜文春陳運等請於知縣

楊儒臣上達大府各增五名士林德之鄉先達吳化等有裨宮

牆投牒邑令請旌春秋丁戊二祭致臚以志不忘

乾隆賀志

鄭其鳳字祉岡十七都人素倜儻雍正閒奉文將丁銀併入苗米帶

徵總書乘機濫派計銀二百八十兩有奇其鳳力訴大府乃豁免

乾隆賀志

范文昇字孝康國學生古槐人性孝友好施予鄉里重之

乾隆賀志

林申甫字久徵年十五海寇劫其父申甫哀號願以身代賊憐而釋之耿逆之變逼授僞職卻不就匿身橘園洲母歿負土營葬考授經歷未久乞養歸脩祠墓置義渡築湖井塘知縣陳諧旌曰功垂

梓里乾隆賀志參
道光通志

陳正松字長觀一字雙橋珠湖人早失怙恃獨持家計時海氛正熾倉皇避寇正松撫六弟二妹保護備至晚尤力行善事創建支祠脩造橋廟恒爲閭里倡年七十八卒孫曾數十人同治彭志

陳宏孝阜山人性孝友與人言和易無忤色尤慷慨好義所居濱海田苦鹵斥宏孝捨田鑿新港南至龍塘角北至龜坡潭計一百七十餘丈以蓄淡水復濬聯橫坡北至貓頭以通於海計八十餘丈合鄉水利賴焉又捐田四十畝爲祖祠祭產族人德之歲祭祖特祔祀以報焉同治彭志

陳鍾字秀訓一字芝庭旒峰人謹飭好讀書嘗肄業鼇峰書院與孟

長樂縣志

卷二十六 列傳六

四十四

義行

超然交最篤晨夕觀摩不問外事主講林枝春深器重之乾隆己卯超然領解首鍾登其榜尺牘往來必以道義相勸勉居鄉和而不流敦孝弟守忠信一二頑梗不法者必多方開導使之感悟掌教甯德書院十餘年多所造就士林德之晚授永春州學正克稱其職同治彭志

陳元盛沙京遮柳人性篤厚視人猶己見碍道荆藜則剪之當途瓦石則拾之時行郊野凡田有水漏與害苗之莠不分人已并力以治始快於心年八十無疾卒同治彭志

陳德燕以字行十四都溝東人貧而廉嘗販米於漳港道拾洋銀三十員守候不去踰時有販魚人王大我者倉皇至德燕詢其故還

之同治彭志

許貴登大洋人仗義輕財鄰里構訟輒捐貲以解其紛有陳林二姓以燃燈相爭各持械數百禍幾不測貴登奔救乃止梅村以建築祖祠涉訟久而不決貴登極力調停訟遂平祠竣梅村人感其德特祀焉同治彭志

陳大堤江田人性樸誠家極貧好行善尤敬惜字紙每日攜竹藍遍地檢拾遇有污穢則用水淨洗晒乾焚化習以爲常鄉之文人嘉其志作竹藍授之分送並給路資所到人爭重之其卒也里人醵錢立碑以表其墓焉同治彭志

劉用賓字觀謙郡庠生漳港人生平禮法自持不苟言笑鄰里望而

長樂縣志

卷二十六

列傳六

四十五

義行

敬之尤篤氣誼視生徒如子姪視朋友如弟兄人咸稱其誠信弟豐字德謙邑廩生手足友愛以道義相切磋鄉有久所神作崇二方巫覡挾之爲利牲牢酒醴演戲賽願者幾無虛日用賓曰此五通之流也光天化日奈何容此邪魅橫行毀其廟摔其像而此風頓息論者謂用賓嚴毅而不絕物豐和易而不徇人性情雖不同操守統歸於正蓋一時稱競爽云同治彭志

謝世南字治江一字慈田廩貢生肄業鼇峯主講朱仕琇器重之性好施遇貧窮解衣推食賙給無所吝至脩文廟新學宮尤不惜傾囊以倡著有蒙齋講義二十四卷東嵐謝氏詩存二卷長子蕢附貢生治家脩身一遵先訓所存質券多至百數十紙晚年悉命焚

之曰此皆無力償者母留爲子孫滋口舌也著有蕉窗筆記四卷

同治
彭志

陳錫璋字爾奏一字二如歲貢生厚福人弱冠補弟子員歷試優等教授生徒講學敦行家居弭爭訟和鄉鄰掩遺骸禁溺女里閭化之書法學二王每日清晨必端書陰隲文一篇及先哲格言分送親友尺幅寸箋人爭寶焉

同治
彭志

陳廷千以字行江田人性篤誠凡遇族中事必力持公道常曰吾族大人衆良莠不齊若不申明祖訓不免恃強凌弱致生事端與族長嚴立規條犯者不少貸族人敬而畏之卒年九十後鄉鄰有事每相謂曰安得起陳廷千而挽此頹風也妻蔣氏亦壽登九十三

長樂縣志

卷二十六

列傳六

四十六

義行

計同伉儷者七十年長子春雷乾隆癸卯舉人

同治
彭志

邱玉山字有寬一字兩峰坑田人乾隆丁酉舉人教諭崇安脩學舍以處從游之士及門如吳錫疇錫珪兄弟類能以儒術爲吏治所得學俸盡以置祭田並婚嫁其兄之子女如禮晚陞漳州府學教授以重聽歸治家嚴雖婦孺必繩以禮法每朔望謁祖祠嚴戒子姪母作非母怙惡不率訓者卽以家法治之族之惡少平時恃強凌弱者自玉山歸咸斂迹焉年七十八卒有兩峰詩集四卷子國鈐嘉慶庚午舉人

同治
彭志

陳學燧字丕樸一字金坡表賢村人乾隆丙午舉人挑取知縣改授教職氣度豁達博學工文與會城林芳春趙士泉陳煨林雨化林

志仁林賓曰陳若霖魏光厚陳穎棠等爲三山十友往來甚契晚年家居鄉里有爭悉就質無不帖服乾隆五十八年同生員吳占鼇劉應芳等呈復濱澗二湖脩堤蓄水以溉四里民田嘉慶間又偕舉人李學蓮陳一鑑等督人夫開鑿陳塘官港四里得免淹浸之患者數十年里人德之卒之日嘆泣者遍里中學蓮輓以句云數所在莫能逃經濟文章終蓋一坏黃土義當爲靡不任鄰里鄉黨宜鑄六尺豐碑

同治彭志

陳魁襟字廷愷一字廣江古槐人父藩邑諸生治家持古道魁襟幼承庭訓友諸弟以仁勗子姪以約自飲食衣服及交游取與之節一秉忠信無流俗奢靡巧詐之習時與後輩談古近事識趣高遠

淵然莫測而辭色閒往往有英偉氣鄉居數十年排難解紛不遺餘力有以豆觴啓釁者咸質成而心折焉終其身合鄉千百戶無有投牒訟庭蓋諸生而善格一鄉者族人庚煥爲之傳

同治彭志

黃觀營字萬達一字見洛青山下人嘉慶己巳歲貢生父邦柱植品勵行篤學工文以優廩生早卒營少失怙恃刻苦自勵弟萬敦觀書均在穉齒課之讀書撫之成立分肥讓甘怡怡無間嗣仲氏萬敦授室而沒遺腹子春膏躬飲食而教誨之周恤備至愛同己子一門之內羣從同居男女數十人無有以嘻嗃聞者卽三尺童子亦知肅然起敬有鄰家子夜入其室竊取衣服觀營見之呼其來前溫語慰藉贈以錢文使之謀生其人卒悔而改行又有陳性某

負重債將鬻童養媳以償觀營聞急往止之袖所立券焚於庭並贈以金令速完婚又徧告諸富家代乞緩追其盛德類如此

陳澍霖字允雅號秋田萬春長子

萬春見文苑傳

以古學第一補邑諸生屢

試優等食廩餼充嘉慶己卯恩貢性孝友家貧竭力事親旨甘必具中年喪弟撫孤姪如己出授徒數十年因材誘掖以變化氣質爲尙常曰深沈精進可決遠到之才浮動飛揚詎是大成之器古人所以先器識而後文藝也故其所造多英雋士晚歲家居日以守分安命順時聽天八字格言勗子姪里有爭訟必開導勸息年七十七以壽終生平留心書法喜吟咏著有秋田吟草二卷子四長際治字行陽一字寸耕童年失恃事父以孝聞性淳樸不妄交

長樂縣志

卷二十六

列傳六

四十八

義行

游而篤於友誼凡脩祠廟砌橋路輒捐貲爲鄉人倡子贊宦豫每

函諭其時事多艱勉圖報稱云

同治彭志

林繼僑字惠可一字柳村邑增生東隅人篤學勵行至老不倦課徒善誘不責脩脯門下士多騰達者卒年八十屬纊時猶訓子孫以孝悌忠信素精篆刻工畫水墨葡萄蓋自陳天民高繼端後鮮有及者

同治彭志

高登峰字則巒流水人邑諸生砥節礪行及門士咸奉爲儀型知縣楊清輪旌其門曰薰德善良蓋表實也與陳觀察學穎幼同筆硯勸善規過不以窮達殊其卒也觀察誄之曰浮生幻夢君先覺晚節叢愆我孰規方正之風可以想見子元傑邑廩生行詣純粹有

父風 同治
彭志

鄭蔚然字序秀別字西林東隅人嘉慶辛酉舉人敦氣節勵廉隅辭受取與概衷諸道雖一介必辨也與兄燦然弟代泮相友愛均負時名邑中公事如文武廟文洽浦書院射圃諸役昆季必倡捐董理其成而蔚然尤狷介不苟知縣楊清輪素重其人常延訪事宜值縣試其子列前茅戒勿入覆曰功名有定無涉嫌疑致損邑侯清德楊公益器重之其卒也哭之慟曰良友殂矣吾誰與規燦然字序登國學生代泮字序魯廩貢生 同治
彭志

王嘉賓字孝龍一字主竹西隅人恩貢生性至孝人以王祥呼之游閩縣蔡容門與陳庚煥交最深故行誼獨醇性好竹晚退居於碧

長樂縣志

卷二十六 列傳六

四十九

義行

蘚齋翠竹百竿古梅一本課子姪生徒循循守禮法人望見之不問而知爲嘉賓子弟所著竹溪筆記四卷未梓仲子道泰咸豐壬子舉人三子又安道光己酉副貢 同治
彭志

黃觀潮字萬董一字畊心附貢生青山下人謙和謹慎篤學能文鄉先輩陳九鼎器之妻以孫女年逾冠受知於督學陸錫熊補諸生性至孝晨昏必問視視同堂兄弟若同胞分多潤寡尤好施與每當春夏交減穀價平糶親鄰待以舉火者常數十家蓋身後六十年猶嘖嘖人口云 同治
彭志

陳鍾濂字諸實一字約軒少不羈稍長折節凝重若老成年十二三與叔庚煥論大學於樹下輒能洞貫明德體用大父挈游九仙山

適羣僧聚談彼法鍾濂推所聞朱子明德之說闢其謬羣僧驚嘆而去爲學不事涉獵鉅訂研精覃思務見其大性孝友世味紛華無所徵逐嘉慶辛酉成進士授國子監學正僉以需次將及留俟銓除鍾濂將母念切冒暑徑歸抵舍數月卒年三十四庚煥爲銘其墓

同治彭志

蔣之竹字興翠一字鳳庭嶼頭人年踰冠以古學第一補邑弟子員晚食廩餼舉優行天性强毅尙節概好直言遇有不平事輒侃侃力爭雖千百人不爲奪居庠序數十年片楮不入公門鄉鄰爭訟者必力爲排解嘗曰好鬪者亡身好訟者破家願以睦鄰爲重母傷和氣其剛正類如此生平友教生徒多所成就尤重氣義有故

長樂縣志

卷二十六

列傳六

五十

義行

人子家貧無依助以膏伙課之讀書卒爲名流時論韙之

同治彭志

陳有涵字丕泳一字液波東隅人職員少讀書精楷法晚尤蒼勁性謙讓與人交和易有禮雖三尺童子不狎也家故饒好周卹乾隆乙卯邑大饑散錢賑乏全活甚多道光癸巳又饑首倡平糶時家已乏穀轉稱貸以濟焉曾倡脩九都桃枝湖人食其利知縣楊清輪褚登咸重之稱爲長厚君子子九人孫曾林立多習儒業有聲

庠序間

同治彭志

陳盛世字康勉一字西河西隅人例貢生以善賈起家好施與尤篤友愛兄弟貧乏者贍之諸姪無力娶婦者資之道光初偕姪逢韶捐貲四百貫重建祖堂祀支祖左右房屋盡以居族屬之貧者常

課子姪曰種德勝積業宜儉不宜吝莫貪意外財莫傷手足義汝

曹昴之卒年六十六

同治彭志

林觀成字沛然一字脩田邑廩生少穎悟好讀朱子小學書稍長專心制舉業得天崇魄力爲省會名師及門者多登科第年四十始返而精求諸四書參以五子近思錄及先儒諸語錄味道之腴勇猛精進永福余潛士閩縣何則賢皆稱其有一日千里之概與人交一本真實善必勸過必規遇時事有不平者雖權貴前必侃侃力爭又嘗舉吏治民風士習之要累書千餘言致故人之出仕者著有四書集註輯液正學準脩田警言芸窗自警史論皆未成書年五十二卒

同治彭志

長樂縣志

卷二十六

列傳六

五十一

義行

王偉堂以字行一字東升別字廉甫潭頭人淹貫經史工制舉業道光丁酉舉於鄉教授生徒嚴重有威講貫之餘每敦勗以循禮守法故游其門者率皆篤實謹厚不獨以能文稱也有牧牛子姜某日過其塾聽偉堂講書久有所得卽能操筆學爲文偉堂奇之助以膏伙親爲指授卒以有成生平裹足公門不問外事其教澤所傳至今猶膾炙人口云

同治彭志

陳輝字位炯一字燎甫嶺南人家貧好學飭躬勵行老而愈篤性耿介不苟取而謙恭和易與人可親故鄉之子弟樂就範圍陳本巨族時有聯宗爭鬪事輝獨能約束族衆數十年鄉鄰賴以輯睦年七十九受知於李學使嘉端謁見慰藉再三云生非虛冒年歲者

觀精神氣色是有內脩之行其見重如此道光癸卯欽賜副榜壽八十九卒

同治彭志

高文騏字長揚一字質園職貢生好義急公嘗助脩文昌宮武聖廟貢院義倉臺江書院萬壽橋洋中亭流憩第一亭鋪六柱洋龍嶺安民崎上杭街留飯舖湯房巷路坊口爲下游之所文騏倡捐成橋行人頌之他如敬節堂團練局育嬰施棺等事俱不惜貲財以成其美辛丑春大府議脩省城垣文騏捐制錢一萬緡葺工後加知府銜**映**夷啓衅文騏捐白金二千兩助軍需奉旨加二級又捐洲田二百餘畝以供萬歲寺燈油魏敬中爲撰文勒於石子彬騰璧銑皆官訓導承父志砌龍門埠頭石道行人利之

同治彭志

長樂縣志

卷二十六

列傳六

五十二

義行

吳觀國字萬統一字光賓京溝人質魯嗜學刻志勵行道光丙午舉人友教生徒無論材質高下胥勗之以勤蓋以身教也鄉鄰有爭訟常就觀國平曲直濱**澗**二湖久爲豪姓侵佔觀國鳴之官復其舊遇早潦巡視啓閉必躬親雖甚雨烈陽弗恤也己酉計偕北上歸卒於延平途次鄉父老聞之皆爲流涕

同治彭志

鄭開倫字潢溪職監生雲路村人遷居會城性友愛好施與兄弟五人合產同爨內外無間言貧困者恒待以舉炊焉

同治彭志

陳茂嗜十三都鶴上村人勇於義全家茹素村有梁公橋圯於水嗜倡里人脩之工鉅欸絀事幾中止嗜輒捐貲以益之及橋成而嗜產以罄故至今猶嘖嘖人口云

陳孚俊雲路人遷居省城文藻山性忠厚好施與鄉人稱貸計所需多寡應之及病革取約券悉焚之曰是固無力償我者母使後人責其逋也子于春初業儒以家貧改習賈古田鄭某悞以重金償貨價于春檢知而其人已去夤夜追還之卒年八十于春孫端徽光緒甲午舉人宣統庚戌會考以知縣籤分浙江

李尙薇字炯垣沙京人有隱德讀書務實踐不屑屑爲章句學待人無少長貴賤一以至誠途遇婦人輒迂道讓其行家故貧躬耕不足以給教授里中執經者踵相接而不責脩脯以故歲所得祇數十金戚友以急告者雖傾囊應之不少吝授生徒書必以手障口不欲以氣息觸人啓迪勸誘終日亶亶無倦容夜則巡行阡陌運

水溉田以爲常吏部主事黃翼爲少游其門一見器之妻以女人服其精鑑生平學有根柢而不得志於有司年五十九歲卒子兆珍夙受庭訓致身通顯誥贈資政大夫

陳萼芬字灑川邑之東渡里人咸豐丙辰進士用內閣中書癸亥補中書缺署侍讀旋以截取同知選雲南阿彌州知州是時回氛方熾萼芬由燕而晉而蜀無日不在兵燹中初謁劉靜丞巡撫於畢節軍次劉升總督繼者爲岑襄勤公檄萼芬辦釐局供軍儲未赴州任回患少熄留辦善後事宜脩鐵橋撤營勇重脩閬陽書院積勞得重聽疾丁內艱歸服闋養父不出家居爲鄉里排解紛難有質曲直者宛轉開導莫不悅服而去光緒丁丑主講吳航書院倡

捐數千金以脩學舍增諸生膏伙邑文風爲一變父歿益無復進取志惟留意於善舉如義學鄉約水利蠲賑育嬰砌橋種樹脩造廟宇諸事必踴躍爲之壬辰總督譚鍾麟聘主鳳池書院逾年卒林森如字松石一字調淮洞湖人附貢生性方正言笑無所苟好獎掖後進里黨之士經其薰陶爭自砥礪行有不檢者輒自戒曰何可使松石公知也治家嚴肅羣從同居男女老稚數十人無間言弟調陽令望江以率請免征遭譴負欠累萬森如貽書曰爲官爲民爲民去官官勿惜也鬻田產百十畝舉償不吝晚猶力行善舉濬湖渠建祠宇悉慨然自任遇貧窮推解調卹多所全活子和荃字衡卿有父風尤工書法

施則常號袞侯大宏里人邑增生父捷鋒道光甲辰舉於鄉穎悟嗜學篤內行則常生負異稟十歲能屬文十六籍於學嫂王氏少寡則常讓產以膳之而舌耕自給精醫術光緒庚子辛丑間里中時疫蔓延經其診治多所全活里有爭執爲平曲直無不悅服凡育嬰敬節及脩葺橋路諸善舉無不極力籌辦卒年六十四子二傳薪平

施寯原名祖霖字蘭脩號桐卿又號問雲光緒己亥舉人幼穎悟讀書日數行下十歲喪父祖母在堂寯恐觸其悲恆陰自飲泣生平見義勇爲戚友有所請事無鉅細難易輒毅然任之教授生徒脩脯所入多以資親族之乏者四赴禮部試皆薦而弗售乃赴部以

知縣注選嘗有句云不期薄俗加青眼但媿慈親已白頭年三十
七卒著有思譽室詩鈔若干卷雜著若干卷尺牘若干卷待刊子
四長景徽四品銜江蘇候補通判次寶廉船政水師學堂畢業生
分省補用縣丞三景琛附貢生候選知府四景崧邑庠生分省補
用直隸州州同

董春捷古槐人少失怙恃賈於尤溪歲祲勸殷戶平糶而先傾己穀
爲倡爲鄉鄰排難解紛率多賠累尤好施與戚族以緩急叩雖掃
庾賑之不吝以病卒同縣少詹鄭叔忱爲銘其墓子英高貢生英
傑太學生登雲文在均武庠國儒郡附生國儒性孝友克承先志
賑貧恤患凡足爲鄉里利賴者皆踴躍爲之子二子才廩貢生子

長樂縣志

卷二十六

列傳六

五十五

義行

良光緒壬寅副舉人

柯雍字聖簡號時安岱西人父壽亨以舉人任莆田教諭雍性聰穎
讀書過目輒不忘年十九爲諸生光緒丙子舉於鄉爲學不拘帖
括喜讀經世書甲申法夷犯福州邑北臨閩江南道敵艦可乘潮
上雍陳請大府設要塞於南岸爲堵截計總督何璟檄員察度形
勢爲建炮臺於广石迄今成重鎮焉主講吳航及臚峰書院訓迪
不倦多所成就時邑之保嬰已開辦無專所雍乃籌款六白金就
塔山毓麟宮舊址重建而設局焉其贊助善舉類皆不遺餘力選
泰寧訓導以母老辭改莆田未到官卒

李鴻圖字紱齋高岐村人少與其弟從同邑謝章鋌游誠慤而勤於

學諸家經說必手自鈔錄壯補博士弟子員光緒丁酉舉於鄉時年近五十將垂垂老矣生平進止必以禮法尤篤宗族里鄰任卹之舉災賑施濟之事悉樂爲之不倦卒時其師章鋌爲之誄有曰懿行毛舉陰德耳鳴邑有吾子志乘之榮蓋爲其生平最得意之弟子云

陳韻珂字玉溪東渡人光緒己丑舉人國史館漢謄錄廣東東倉鹽大使爲人品方行潔見義勇爲東渡之東爲閩長福三邑交界地無賴者恒於此肆劫掠韻珂請於大府擇蕉嶺地設保甲局自是前弊盡絕行旅便之死之日三邑之民祀之於保甲局後院以報創設之功云

鄭勳字勳甫一字石伍坑田人少沈毅尙氣節弱冠游邑庠旋食餼家貧授徒鄉邑間光緒壬寅舉於鄉甲辰試春官罷歸同邑高某病滯上海勳挾之登舟備藥餌以療計抵家僅兩程冀得生還揚帆不數里高沒舟中輪船洋人忌停屍遇死者輒投之海勳祕其迹朝夕佯進飲食既抵岸舁屍歸其家人咸以爲義甲辰任吳航兩等學校校長清操自勵造士極一時選暇則託於詩歌著有洗耳餘音和蟀吟兩集

施德輝字聯巖大宏里人邑庠生性純謹好施與里鄰窮乏者恒周卹之於師友間必以道義相切磋生平以培植後進爲己任嘗設館中巖課弟姪輩多成名科舉旣廢又集同志改臚峰書院爲兩

等學堂以廣教育大宏水利係籌港支流德輝倡捐巨資造橋於
分流處名曰高橋並作閘以蓄水合鄉至今賴焉

林文慶字錫軒梅花人狀魁梧性亢爽好義疏財不屑權子母里鄙
貧困者貸不責償鰥爲娶病爲醫死亡爲喪葬靡不盡力里中公
益事雖艱巨獨任不辭也知縣王叔謙旌其閭曰望重梅城年五
十九卒鄉人至今猶頌之

義行補遺

鄭萬尊仙歧人邑庠生尙氣義膽畧過人仙歧地濱海海寇擾劇萬
尊選丁壯禦之寇不敢近然恨益深一日寇遇諸途掠去支解之
至今猶呼鄭四腿云

按萬尊乾隆時人前志遺茲考其家
譜與父老之傳聞悉相符因補之

隱逸

宋

劉世脩字景周性恬淡不樂仕進嘗授承信郎監行在贍軍激賞庫尋棄歸留意黃老之術建得間堂於雷會峰列植花果竹木日與文人羽客觴詠談玄不與人閒事其妻兄陳自強與韓侂胄有師友之舊不數年位至宰相嘗以書辟世脩世脩力辭不就因號慧觀翁後自強敗世脩得不預其禍年八十六端坐而逝

乾隆賀志按劉氏家譜有高隱雷會峰事畧係其裔孫沂春所撰夏允彝為之序曰士不為苟隱必有所以處也非代之方季則革易之會耳豈徒泉石膏肓傲世自足哉長之邑連山疊雲老其間者何限而以隱逸著者寥寥數人隱何易言也如景周劉先生一時權貴辟以有道作光公棲遲雷會高隱不仕其節良有足多者焉

長樂縣志

卷二十六

列傳六

五十八

隱逸

維仲失其姓紹興閒耽書樂道晦跡林泉詔三辟之竟不起

弘治劉志

元

林清字以寧阜山人泰定閒屢辟不就賜旨劄云儒士林以寧道貫萬殊年高七袞明經脩行不求聞達於當時勸士崇賢宜爾贊揚於盛世賜號阜林梅隱處士

乾隆賀志

陳東字景賜沙隄人少雋敏篤學經史百家及釋氏書多所研獵工詞賦比長浮游沅湘吳越間諸所游覽輒形歌詠或至禪房道榻凝香默坐迨如也僉郡同知郭履辟為郡邑儒學辭不就僉憲趙承禧以遯跡邱園不求聞達薦東曰吾既不求聞達乃復名塵薦剡去之隱居足跡不至郡城著有雜文并詩集

乾隆賀志

明

劉一企諸生自號抱一山人默而好深湛之思遂棄舉業著陰符難經衍喜古文辭偶身步若翽遇當意輒戲媵跳舞從傅汝舟治竹

筐食擔壺蘆游武夷山遇仙

道光通志

林紹字淳裕能詩尤工五七言長律永樂時邑人王堅王恭交章薦

於朝部檄徵之不起有林泉清響集

乾隆賀志

林敏字汝學一字漢孟號瓢所又號佺冥子又號青羅山樵羅田人宋林簡肅之裔資性穎悟讀書過目成誦爲詩刻勵清新與周佺

黃佺輩締詩社永樂五年以人材薦不就卒

乾隆賀志

鄭文霖字汝衆號耽犁子邑西永甯坊人好善樂道洪武中嘗應辟

長樂縣志

卷二十六

列傳六

五十九

隱逸

不仕與周佺鄭定高棟王恭陳亮諸人賡咏尤耽於耕故號耽犁嘗曰吾拙於進取惟犁鋤是耽安於蹇窮惟稼穡是務方吾犁之在手也茫乎其無思熙乎其自恬不啻執圭秉璧之榮而運斤游刃之適也所著有耽犁子一卷榜眼練子寧爲之賦狀元張顯宗爲之跋裔孫佺工詩畫有祖風

乾隆賀志

陳本字叔固全之子

全見文苑傳

性耿介善詩文敦尚古道不慕榮名隱

居江田與聞人逸士吟咏有詩文若干卷

乾隆賀志

李仕黼字士殷號泗峰邑西人望隆學校不求聞達教人以孝悌脩身爲本四方名士多出其門家甚清卻貧士贄禮父母兄弟并外父母事生送死皆資之毫無所吝學舉德行首推焉著五經纂要

當貢而卒祀鄉賢

乾隆賀志

梁春暉字時皇號淑三江田人諸生隆武乙酉領恩貢明亡杜門不出授徒講學終其身有雲龕遺稿一卷

雲龕山名卽龍龕山在縣南千溪潭上有歸雲閣望

海亭香鑪峯諸勝春暉晚年卜居其地故以名集

其生辰識感云不堪思往事未易說完

人又除夕云三閒破屋完吾事一片斜陽照此心其志事可以想

見參江田梁氏詩存同治彭志

張振玉號梅如東隅人諸生性孝友尙氣節與同郡吳大正相友善明亡大正死之玉哭臨甚哀曰吾爲親之故偷生人間冥冥之中

負此良友遂隱居鼇山不入城市談及時事輒義形於色

參張氏家譜同

治彭志

長樂縣志

卷二十六

列傳六

六十

隱逸

謝杲肇淞季子諸生自號青門老人少隨父授書見忠臣孝子義夫節婦傳輒流連向往之壯歲明亂避地幽隱凡山高水深人跡罕到之處靡不游歷以舒憂憤甲申後明社旣屋棄儒巾杜門掃軌念世受國恩偷生人世恆涕泣不自己迨庚戌春浪迹北游自吳楚以及齊晉燕趙諸名區嗟河山之改色望宮闕而徘徊又歛歔淚下者久之庚申秋自吳門抱病歸遂不復出凡閩中殉難苦節及潛身沙門絕意進取者若干人概爲傳論成節義錄二卷其已經贈官易名及身尙未死者弗錄其自序略曰吾職非史官志在發潛德之幽光不忍其同湮沒於寒烟蔓草而已連江陳元龍爲之序曰老人家學淵源吾固知太史之有子長叔皮之有孟堅衡

泌樂飢其亦困而不失所亨乎同治彭志

陳名賓號際伍邑廩生雲路人敦名節善屬詩文著有理學真偽論書經講述知縣夏允彝雅重之常贈以七言古風詩別見時海氛起

名賓與長子副貢鳴瑜次廩生鳴琪謝試事築室松坪偕隱以老清榜眼吳文煥懷以詩云種樹種松柏論文論古人松柏節不改古人德不涇御史陳書爲之序同治彭志

清

董捧日十二都古槐人邑諸生通易理精卜筮雅不與俗近中年卽不應舉結草廬於董奉山嘯傲烟霞悠然也乾隆賀志

高文字克斌大宏里人喜讀書不樂仕進小築數楹蒔花種竹每游

長樂縣志

卷二十六

列傳六

六十一

隱逸

山水竟日忘歸著作多不盡傳於文石志見一斑焉乾隆賀志

流寓

宋

陳襄字述古侯官人慶歷間嘗游靈峯寺題五律於壁上永樂時墨

蹟猶存乾隆賀志

方元宥字道輔莆田人少與伊川游伊川遺書云足下非混俗之流

其志道之士仕至宣議郎威武軍節度推官乾道中嘗游靈峰山

學者歎留論道久之歸雲洞並龍泉寺石刻猶存乾隆賀志

徐鐸宋熙寧丙辰狀元常游長樂築室於錦陽居焉今其地為毓麟

宮仍祀木主於旁乾隆賀志

李綱字伯紀邵武人建炎間丞相為言者論罷紹興初許自便居福

長樂縣志

卷二十六

列傳六

六十二

流寓

州尋移居長樂五年起用觀文殿學士除江南西路安撫制置大

使兼知洪州六年准告兼營田大使旋引疾乞罷八年還居長樂

後三歲卒於福州寓舍年五十八合葬郡之懷安山乾隆賀志

朱熹字元晦建陽人因避學禁寓邑之二都龍門後人名其所寓樓

曰紫陽既復寓於方安里之龍峰巖里人劉砥劉礪兄弟從而受

業焉今其地稱為晦翁巖乾隆賀志

陸秀夫張世傑德祐末楊淑妃偕弟亮節負益王昷廣王昺播遷溫

州秀夫以兵會之因與張世傑陳宜中楊亮節奉二王航海自礪

澳歷王母礁磁澳文石澳入閩安鎮乾隆賀志

陳天民福清人寓龍門元應宮善寫葡萄幼隨父宦山東游泰山日

觀有道士知歸子善於葡萄天民學之遂得其妙

乾隆賀志

明

周佺字又佺一字微之閩縣人嘗令數蒼頭肩書數千卷縱游四方

來邑寓龍門高棟家曰吾益友也與居十年辭去盡棄其書曰在

吾胸中矣後徵任禮部員外郎

乾隆賀志

練纓子寧裔孫與弟綺竄寓長樂萬歷閒纓子思祖手哀子寧遺事

伏闕上書請卹典大學士葉向高布政謝肇淛侍郎董應舉各爲

文以送其行

乾隆賀志

錢肅樂四明人崇禎丁丑進士官至吏部尙書常托跡於三寶西石

鰲峰東林諸勝所至賦詩居數年後卒海島中

乾隆賀志